



Quai èn ils vicecampiuns grischuns da gruppas en la categoria da l'arma da sport sin la distanza da 300 m: Gion Cajochen, Paul Wenzin, Otto Bass, Marinus Foppa e Marcus Flury (da san.).

FOTOS V. ZIMMERMANN



Vicecampiuns en la categoria cun l'arma da militar sin la distanza da 300 m èn vegnids ils tiradurs da la gruppada da Sent: Andri Krebs, Ueli Krebs, Jakob Gartmann, Cornelia Valentin e Men Benderer (da san.).

Intginas gruppas han procurà per ina surpraisa

Cuira: Tir final grischun da gruppas

DA GION NUTEGN STGIER / ANR

■ Gronds victurs da l'occurrènz chantunala èn ils tiradurs da Cuira. Tar il tir final grischun han lur gruppas gist cuntanschi ina traidubla victoria. Sin la distanza da 300 han dentant er persvas ils tiradurs sursilvans ed engiadinais, quai cunzunt quels da Sumvitg, Ruschein e Sent. Il tir final grischun da gruppas è adina in dals puncts culminants da la stagiun da tir. Tar quel vegnan berg mo eruids ils campiuns grischuns da las societads da tir, mabain vegnan er eruidas quellas gruppas dal Grischun che sa participeschan a l'emprima da trais rundas naziunalas. En bun trais mais ha lura lieu il final naziunal a Turitg, nua che las pli fermas gruppas da la Svizra cumbattan per il titel da campiun svizzer. Ina giada dapli èn las relaziuns da tir stadass difficilas al Rossboden a Cuira tar il final grischun da gruppas. Quai conferman, cun intginas excepziuns, er ils resultats ch'èn stads en cumparaziun cun las duas prerundas grischunas, considerablamain pli bass. La glisch variabla e cunzunt il vent al Rossboden han ina giada dapli betg fatg simpel a l'elita chantunala da tir.

Cun las gruppas da Sumvitg e Ruschein èsi adina da quintar

En il champ A, quel cun l'arma da sport sin la distanza da 300 m, aveva la gruppada da Cuira citad già gudagnà la prerunda grischuna. Cun profitar dal bonus da chasa e sin fundament dals buns resultats da qualificaziun era la gruppada dals tschintg tiradurs da la chapitala da noss chantun il grond favorit. Els han lura er sajettà duas fermas rundas en il final e cunzunt duas rundas fitg equilibradas. Cun in resultat da 1915 puncts èsi schizunt reüssi a la gruppada da Cuira citad da



sajettar otg puncts dapli che en las duas rundas da qualificaziun. Tratg pli ferm che en quellas duas rundas ha lura er la gruppada da Sumvitg Vial e sa meglierada dal 4. post sin il 2. post. La basa per il bun resultat en il final han ils tschintg tiradurs Gion Cajochen, Marinus Foppa, Marcus Flury, Otto Bass e Paul Wenzin fatg en l'emprima runda cun in resultat da 954 puncts. Cunzunt Gion Cajochen ha sajettà cun 196 puncts, be quatter puncts damain ch'il maximum e contribuì bler che sia gruppada è vegnida vicecampiunessa grischuna. Avant in onn per exempel aveva la gruppada da Sumvitg mantgantà in plaz da podest per diesch puncts cun il 7. plaz. Sajettà ina ferma segunda runda en il final han lura ils tschintg umens da la Societad da tir Ruschein Vorab, Giusep Plazi Cadruvi, Gie-

ri Maissen, Roman Egger, Guido Sgier ed Ignaz Caduff. En la rangaziun intermediara sunter l'emprima runda en il final aveva la gruppada da Ruschein anc sajettà nov puncts damain che la gruppada da Puntraschigna. Cun il resultat da 952 puncts era quella rangada sin il terz post intermediar. En la segunda runda han ils tschintg Engiadinais dentant fatg be 940 puncts ed ils tschintg tiradurs da la Surselva persunter 949 puncts. A la fin avevan uschia omaduas gruppas sunter las duas rundas in resultat da 1892 puncts e decidì a favur dals Sursilvans ha il meglier resultat singul. Remarcabel è dentant bain che da las trais emprimas gruppas dal final 2012, Haldenstein, Favugn e Castrisch, han naginas cuntanschi in plaz sin il podest tar il final actual. A la gruppada da Castrisch han mancà da pre-

schent dus puncts per il terz post malgrà il resultat excellent da 952 puncts en la segunda runda.

Cun la gruppada da Tavau ha nagin fatg quint

En la categoria D, quella nua ch'i vegn sajettà cun l'arma da militar, eran las gruppas da Monstein, Castrisch e Tumein las favoritas per gudagnar il final. Quai naturalmain er cun dominar ils tiradurs da quellas trais societads las duas prerundas da qualificaziun. A Cuira en il final cumenza dentant tut da nov, cun autras relaziuns e cundiziuns. Sunter l'emprima runda era lura er la gruppada da Tumein a la testa da la rangaziun intermediara e quai cun in resultat da 696 puncts. La gruppada da Monstein aveva fatg be 675 puncts e cun quel resultat er

betg pli en direzzion podest. «Be» 681 puncts en l'emprima runda dal final han dentant er fatg ils tschintg tiradurs da Castrisch, ils campiuns grischuns 2012. Cun ina buna segunda runda era dentant anc pussaivel da cuntanscher in plaz da podest. Quai è però betg stà il cas, er sche ils Sursilvans han sajettà trais puncts dapli che anc en l'emprima runda. Ina segunda runda fenomenala han già ils tschintg tiradurs da la gruppada da Tavau. Els han fatg 699 puncts, 20 dapli che en l'emprima runda ed uschia gudagnà l'occurrènz. Sunter las duas rundas da qualificaziun era Tavau be sin il 15. post e cun quai procurà en il final per la pli gronda surpraisa. Vicecampiuns èn vegnids ils tschintg tiradurs engiadinais da Sent che han cunzunt tratg cun 691 puncts ina ferma emprima runda. 22 puncts damain ha dentant fatg la gruppada da Tumein ed a la fin cuntanschi il terz post cun in avantatg da dus puncts sin ils tschintg tiradurs da Samignun.

Rangaziun

300 m champ A (total 16 gruppas, 12 qualificadas per l'emprima runda naziunala)

1. Cuira citad, 1915, 2. Sumvitg Vial, 1898, 3. Ruschein Vorab, 1892, 4. Puntraschigna, 1892, 5. Castrisch, 1890, 6. Poschiavo, 1888, 7. Alvrà, 1881, 8. Laax-Falera, 1881, 9. Haldenstein, 1887, 10. Favugn, 1869, 11. Fanas, 1868, 12. Degen Rofna, 1863.

300 m champ D (total 21 gruppas, 16 qualificadas per l'emprima runda naziunala)

1. Tavau, 1378, 2. Sent I, 1375, 3. Tumein I, 1370, 4. Samignun, 1368, 5. Castrisch, 1365, 6. Maladers, 1361, 7. Uors-Glogn, 1359, 8. Bregaglia, 1355, 9. Monstein I, 1354, 10. Tumein II, 1352, 11. Signias Versomi, 1351, 12. Schuders, 1350, 13. Alvrà, 1348, 14. Monstein II, 1347, 15. Schiers/Aschera, 1346, 16. Sent II, 1342.

Pistola 25 m

1. Cuira, 1103, 2. St. Antönien, 1079, 3. Küblis, 1064.

Pistola 50 m

1. Cuira, 732, 2. St. Antönien, 731, 3. Küblis, 717.



Las trais gruppas ch'èn stadass sin il podest en il champ D, quel cun l'arma da militar: ils tiradurs da Tumein, Tavau e Sent (da san.).



E qua la tiradura ed ils tiradurs che han dominà la concorrenza da las distanzas da 25 m e 50 m: Las gruppas da St. Antönien, Cuira citad e Küblis (da san.).